

CHA'Q'UEJLEL BA JUN TSA' BA I TS'IJBU PABLO CHA'AN JINI AÑO' BA TI CORINTO

**Jun cha'an ochemo' ba ti t'an
Dios ya' ti Corinto**

1 ¹ Joñon Pablojon. Yajcɔbilon ba
ajsubt'an ñumel i cha'an Jesucristo
cha'an che' yom Dios. Quic'ot la
quermano Timoteo chancol lojon c
ts'ijbubeñetla ili jun ochemet ba la ti'
t'an Dios ya' ba añet la ti lum Corinto ba
i c'aba' yic'ot pejtayeel i cha'an ba Dios
ya' ti pejtayeel pañimil Acaya ba i c'aba'.
² La' ajniquetla ti yutslel i pusic'al Dios
yic'ot i ñlch'tyalel la' pusic'al tyalem ba
ti Dios lac Tyat yic'ot ti lac Yum
Jesucristo.

Ti' ñusa wocol Pablo

³ La' lac sub i ñuclel Dios i Tyat lac Yum
Jesucristo. Jiñlch lac Tyat mu' ba i
p'untyañonla. Jiñlch Dios mu' ba i bej
ñuc isabeñonla lac pusic'al.

⁴ Dios mi' ñuc isabeñonla lac pusic'al ti
pejtayeel lac wocol che' mi la quilan
wocol cha'an joñonla je'el ch'ujbi lac ñuc
isabeñob i pusic'al jini yaño' ba chancol
ba i yilan wocol. Che' jini mi lac ñuc
isabeñob i pusic'al jini año' ba i wocol
che' bajche' ti' ñuc isabeyonla lac
pusic'al Dios je'el.

⁵ Como chancol lojon c wen ilan wocol
je'el che' bajche' ti yila wocol Cristo.
Chl'ach je'el cha'an ti Cristo mi lac wen
ñuc isabentyel lac pusic'al.

⁶ Jin cha'an mi chancol lojon quilan
wocol, mi lojon quilan cha'an i ñuc
isantyel la' pusic'al yic'ot cha'an la'
cotyantyel. Che' mi' ñuc isabeñon lojon c
pusic'al Dios mi lojon ñuc isabentyel
lojon c pusic'al cha'an jatyetla je'el mi la'
ñuc isabentyel la' pusic'al. Che' jini
ch'ujbi la' cuche' ti wen jini wocol che'
bajche' mi lojon cuche' je'el.

⁷ Como cujil lojon isujm ti xuc'tyalel
lojon c pusic'al che' bajche' mi quejel la'

wilan wocol chl'ach mi lojon quilan
wocol je'el. Pero cujil lojon isujm mi
quejel la' tyaje' i ñuc isantyel la' pusic'al
ti Dios je'el che' bajche' mi lojon c ñuc
isabentyel lojon c pusic'al.

⁸ Hermañujob, com lojon mi la' ña'tyan
bajche' ti lojon c ñusa wocol ya' ti
pañimil Asia ba i c'aba'. Ñoj wocol ti
lojon c ñusa jintyo mach ch'ujbi lojon c
bej cuch ti lojon cubi. Ma'ix mi quejel
lojon j colel ti cubi.

⁹ Ti lojon cubi che' bajche' jini mu' ba
quejel i yajq'uel ti tsansantyel. Pero
chl'ach ti aq'uentiyon lojon c ñusa wocol
cha'an ma'ix mi lojon c pensalin mi an
lojon c bajñel c p'atyalel pero cha'an mi
lojon c xuc'chocon c pusic'al ti Dios mu'
ba i tyejchisan loq'uel sajtyemo' ba.

¹⁰⁻¹¹ Dios ti yac'ayon lojon ti cojlel.
Chancol tyo i bej colon lojon ba'
bablq'uen mi lojon c sajtyel. Cujil lojon
isujm tic pusic'al mu' tyo i quejel i bej
ac'on lojon ti colel Dios che' mi la' bej
tyajon lojon ti oración che' cablob mi'
tyajon lojon ti oración. Cha'an ti
yoración cablob, cablob tyo mi quejel i
suben Dios wocox i yala cha'an ti
pejtayeel i yutslel mu' ba i yalq'ueñon
lojon Dios.

Ma'an ti wa' c'oti Pablo ya' ti Corinto

¹² C'ajacña lojon coj como mach'an cha
ba mi yale' lojon c pusic'al. Como ti
ajniyon lojon ti sac yic'ot ti wen bajche'
mi' mulan Dios wa' ti mulawil. Más tyo
chl'ach ti ajniyon ti wen ya' ba' añetla.
Pero mach che'ic jach ti ajniyon ti wen
cha'an ti lojon c bajñel c ña'tyabal jach.
Chl'ach ti' cotyayon lojon cajñel Dios ti i
yutslel.

¹³ Jini mu' ba lojon c ts'ijbubeñetla tij
carta junlajal i sujmllel yic'ot mu' ba
lojon c pensalin. Chl'ach bajche' mi lojon
c ts'ijbun chl'ach je'el mi lojon cale'.

Ma'ix cha'chajp lojon c pensal. Com mi la' wen ch'ám'en i sujmllel j carta.

14 Cháncol la' ts'itya' ch'ám'en isujm yajcábilon bá ajsubt'an ñumel ya' ba' añetla. Tijicña mi quejel la' wubin cha'añon cha'an tic subeyetla i t'an Dios. Chá'ach bajche' tijicña mi quejel lojon cubin je'el cha'an ti jatyetla ti jim bá q'uín che' mi tyálel lac Yum Jesús.

15 Cha'an mic ña'tyan c'ajacña la' woj cha'an yajcábilon bá ajsubt'an ñumel la' cha'an, tic wá ña'tya' cha'yajlel mi quejel c ñumel ti jula' ya' ba' añetla. Junyajlel mij c'otyel che' cháncol c ñumel majlel ti jula'. Ti cha'yajlel che' cháncol c cha' ñumel c jula' añetla tic sujtyel cha'an cha'yajlel c'ajacña la' woj mi quejel la' wubin.

16 Tic pensali c jula' añetla che' cháncol tyo c ñumel majlel ti jula' ti pañimil Macedonia bá i c'aba'. Tic pensali c cha' jula' añetla che' mic cha' ñumel tic sujtyel ti Macedonia. Che' jini ch'ujbi la' majlel la' wálc'on che' mic majlel ti pañimil Judea bá i c'aba'.

17 ¿Cha'chajp ba c pensal mi la' wálc che' chá'ach ti cálc? Mach che'iqui. Ma'ix mi cále' mi mux c tyálel che' ma'ix mic pensalin c majlel che' bajche' yaño' bá mu' bá i lolon alob ti cha'chajp.

18 Pero Dios yujil mach'an mi lojon c lolon subeñetla: Muc'ach c cha'len, cho'on lojon, che' ma'ix mi lojon c pensalin c cha'len.

19 Como mach'an cha'chajp i pensal Cristo Jesús i Yalobil bá Dios. Melelách i t'an Cristo tsa' bá lojon c subeyetla quic'ot Silvano quic'ot Timoteo.

20 Ti Cristo cháncol i lu' ts'actiyel jini tsa' bá i wá alá Dios. Jin cha'an ti Cristo mi lac suben i ñucllel Dios che' mi la cále': Amén, cho'onla, cha'an che'alach yom.

21 Diosach tsa' bá i xuc'chocobeyon lojon c pusic'al ti Cristo tsa' bá i xuc'chocobeyetla la' pusic'al je'el. Ti' palyayonla cha'an mi lac cha'liben i troñel.

22 Dios ti yalc'onla i wentyálel lac sellojlel cha'an tsiquil i cha'añonla. Ti yotsá Ch'ujul bá i Ch'ujlel ti lac pusic'al. I

señajlel cha'an tsiquilách an tyo yamba mu' tyo bá quejel la cáq'uentyel.

23 Max tyo ba'an tic ñaxan jula' añetla che' ñac tsajniyon ti Macedonia che' bajche' tic wá pensali como mach com cotsan la' ch'ájyemlel che' mic wera tyoj isañetla cha'an ti caj jini tsa' bá la' cha'le. Yujil isujm Dios melelách c t'an.

24 Mach cha'an com lojon c wera xiq'uetla bajche' yom mi la' ch'ujbin. Como xuc'uletixla. Pero com lojon j cotyañetla la' más ubin c'ajacña bá la' woj.

2 ¹ Jin cha'an mach'an tsajniyon c cha' jula' añetla como tic pensali mach com cotsabeñetla la' ch'ájyemlel che' mic cha' jula' añetla.

² Como mi cháncol cáq'ueñetla la' wubin la' ch'ájyemlel, ¿majch tyoqui mi quejel i ñuc isabeñon c pusic'al che' jini? Jatyetyáchla. Pero tsa'ix cotsabeyetla la' ch'ájyemlel mi tic wa' tyoj isáyetla.

³ Jin cha'an tic ts'ijbubeyetla jun cha'an c tyoj isañetla. Como mach com tyálel ya' ba' añetla cha'an la' wálc'ueñon c ch'ájyemlel che' max tyo ti la' tyoj isa' la' bá. Pero jatyetyáchla yom mi la' wálc'ueñon c tijicñayel. Como tic ña'tya' che' c'ajacña coj mi cubin ti pejtyeuletla c'ajacña la' woj mi quejlel la' wubin je'el.

⁴ Pero che' ñac tic ts'ijbubeyetla jini jun tic cha'le pensal. Ch'ájyemon. Jinic tyo tic cha'le uq'uel. Pero mach'an tic ts'ijbubeyetla cha'an jach com lolon cáq'ueñetla la' ch'ájyemlel pero cha'an mi la' ña'tyan mic wen p'untyañetla.

Yom i ñusábentyel i mul jini tsa' bá i tyaja i mul

⁵ Pero mi an majch ti yalc'on c ch'ájyemlel, mach c bajñelic ti yalc'on c ch'ájyemlel pero tsa'ix i yálc'uetla la' ch'ájyemlel ti la' pejtyeel je'el. Ma'ix mi cálc cha'an yoque ti pejtyeuletla ti yálc'ueyetla la' ch'ájyemlel.

⁶ Jasal wale tsa'ix la' motin aq'ue i ñusan wocol cha'an ti caj i mul jini quixtyañu. Wale tsa'ix i tyoj isa' i bá.

⁷ Pero wale iliyi yom mi la' ñusaben i mul. Yom mi la' ñuc isaben i pusic'al

cha'an ma'ix ñoj ch'ajyem mi yubin ame machic cuych i ch'ajyemlel mi yubin.

8 Jin cha'an mic subeñetla ti wocol t'an cha'an mi la' cha' pas'en chancol la' p'untyan.

9 Jin cha'an tic ñaxan ts'ijbubeyetla bajche' yom mi la' walaq'uen i ñusan wocol cha'an ti caj i mul jini quixtyañu cha'an mij q'uele' mi mux la' lu' ch'ujbibeñon cha' ba mic subeñetla.

10 Wale iliyi che' tsa'ix la' ñusabe i mul mic ñusaben i mul je'el. Como che' tic ñusabe i mul, mi anic cha' ba yom ba mic ñusaben, tsa'ix c ñusabe che' bajche' yom ti' tyojlel Cristo cha'an la' wenlel.

11 Yom mi lac ñusaben i mul cha'an mach ch'ujbi i más yasañonla ti mulil Satanás. Como wen la cuyil isujm mi' bej saclan bajche' mi' lotiñonla cha'an i yasañonla ti mulil.

Ma'ix tijicña Pablo ya' ti Troas

12 Che' ñac ti c'otiyon ya' ti lum Troas ba i c'aba' cha'an c sube' i t'an Cristo, an cabal c troñel como cabal yom i yubiñob i t'an lac Yum.

13 Pero ma'ix tijicñayon como mach'an tic tyaja la quermano Tito. Jin cha'an tic subeyob mux c majlel. Ti bej majliyon ti pañimil Macedonia ba i c'aba'.

Lac ganar cha'an ti Cristo

14 Pero wocox i yala Dios mi' bej cotyañonla lac ganarin i p'alyalel laj contra cha'an ti Cristo Jesús. Dios mi yalaq'ueñob i cañob i t'an Dios cha'an ti joñon lojon. Che' bajche' yowocña ba pom i cañol i t'an Dios mu' ba i pam pujquel.

15 Como che' bajche' yowocniyonla ba pom mu' ba i yalaq'uentyel Dios ti Cristo. Mi' pam puc i ba jini yujts'il yubil ba'an jini mu' ba i cotyantyel yic'ot ba'an jini mu' ba i majlel ba' mi' ñusan wocol cha'an ti caj i mul.

16 Pero i t'an Dios mi yac' ti sajtyel jini mach ba ba'an mi' mulaben i yujts'il i t'an Dios. Pero mi yalaq'ueñob i cuxtyalel jini mu' ba i cotyantyel mu' ba i mulaben i yujts'il yubil. Ma'an majch i bajñel jasal i c'ajñibal cha'an jini ñuc ba troñel.

17 Ma'ix mi lojon c lolon c sube' ñumel i t'an Dios cha'an jach com lojon ganarin tyaq'uin. Ma'ix mi lojon xac'tyun ti yamba t'an che' bajche' mi' cha'len cabal quixtyañujob. Pero mi lojon c sube' i t'an Dios ti jump'ej lojon c pusic'al. Como chocolon lojon tyalel ti Dios. Mi lojon c cha'len t'an che' bajche' mi' mulan Dios. Como cuyil lojon isujm mi' q'uelon lojon Dios como ajtroñelon lojon i cha'an Cristo.

Cha'an tsiji' ba trato ba t'an

3 1 Che' chancol cale' bajche' ti ujti cal, ¿chancol ba lojon cale' mi weñon lojon yubil? ¿I c'ajñibal ba mi la' wubin cha'an c tyaje' majchqui mu' ba i melbeñetla jun mu' ba i yale' mi weñon lojon? ¿I c'ajñibal ba mi la' wubin cha'an j c'ajtibañetla jun mu' ba i yale' mi weñon lojon che' bajche' mi' cha'leñob yaño' ba? Mach'an.

2 Ma'ix i c'ajñibal yamba jun como che' bajche' cuñetla yubil ba' mi la' tsictisan ti la' melbal mi weñon lojon. Como tsiquil ti jatyetla mi añach lojon j c'ajñibal.

Ch'ujbi i ña'tyañob i sujmllel bajche' añon lojon cha'an ti jatyetla che' mi' lu' q'uelob lojon cun yubil che' mi' q'ueletla.

3 I juñetla Cristo yubil. Tsa'ix i majñabon lojon j c'ab Cristo cha'an c ts'ijbuben cha'an i lu' q'uelob yaño' ba. Mach'an ts'ijbubil jini jun ti tinta pero ts'ijbubil ti Ch'ujul ba i Ch'ujlel Dios. Cuxul Ch'ujul ba i Ch'ujlel Dios. Mach'an ti' ts'ijbubenti jini jun ti wechel ba tyun che' bajche' ti c'ajni ti ñoj oniyix pero ti ts'ijbunti ti i pusic'al quixtyañujob yubil cha'an i lu' q'uelob bajche' mi la' wajñel che' ochemetla ti' t'an Dios.

4 Tsiquil yajcabilon ba i cha'an Dios cha'an ti la' ch'ujbi. Como chancol c ch'ujbin Dios ti pejtyelel lojon c pusic'al cha'an ti Cristo. Jini mi' cotyañon lojon.

5 Ma'ix lojon c bajñel c'ajñibal cha'an c cha'liben i troñel Dios. Pero cha'an ti' p'alyalel Dios quic'ot ch'ujbi lojon c cha'liben i troñel.

6 I bajñel Dios ti yalaq'ueyon lojon j c'ajñibal cha'an c cha'liben i troñel ti jini

tsiji' bAtrato bA t'an i cha'an bA Dios. Mach jiniqui mi lojon c sube' lojon cha'an lac ch'ujbiben jini ts'ijbubil bA mandar tsa' bA aq'uenti Moisés. Pero mi lojon c sube' cha'an lac ch'ujbiben jini mu' bA i yAq'ueñonla tsiji' bA laj cuxtyalel mach bA ba'an mi jilel. Como jini oniyix bA ts'ijbubil bA mandar mi yAc' ti sajtyel quixtyañu. Pero wale cha'an ti Ch'ujul bA i Ch'ujlel Dios mi la cAq'uentyel laj cuxtyalel mach'Λ yujil jilel.

7 Jini i mandar tsa' bA aq'uenti Moisés tsa' ts'ijbunti ti wechel bA tyun. Jini mandar ti aq'uenti ti sacleman bA i c'Ac'al cha'an ti ñuclel jini mandar. Jin cha'an mach ch'ujbi i q'uelben i ni' i wut Moisés jini israelob como wen sacleman i ni' i wut. Pero xuc'ul ti queji ti lajmel i saclel i ni' i wut. Cabal i ñuclel jini oniyix bA mandar tsa' bA aq'uenti Moisés. Pero aunque an i ñuclel jini mandar mi yAq'uen i majlel quixtyañu ba' mi' ñusan wocol ti caj i mul.

8 Pero ñoj cabal i ñuclel jini t'an mu' bA i yAq'ueñonla Ch'ujul bA i Ch'ujlel Dios wale iliyi.

9 Aunque añlach i ñuclel jini t'an mu' bA i yAq'ueñob i majlel quixtyañu ba' mi majlel i ñusan wocol cha'an ti caj i mul pero yoque más añlach i ñuclel jini t'an mu' bA i yAl cha'an Dios mi yAq'ueñonla laj q'uejlel ti tyoj ti Dios.

10 Como jini oniyix bA mandar am bA i ñuclel ti ñoj oniyix ma'ix ñoj ñuc cha'an ti caj más anix i ñuclel jini tsiji' bA mandar.

11 Aunque ñuc jini mandar tsa'ix bA jili i c'AJnibal wale iliyi, yoque más ñuc jini am bA i c'AJnibal c'Ala ti bele' ora.

12 Cha'an cujil lojon isujm mach'an i jilibal i ñuclel jini t'an mu' bA lojon c sube', jin cha'an mach'an mi lojon bac'ñan c cha'len t'an.

13 Ma'ix mi lojon c mac i ni lojon c wut che' bajche' ti' cha'le Moisés che' ñac ti' moso i ni' i wut cha'an mach'an mi yilabeñob israelob che' chAncol i yajpel majlel i saclel i ni' i wut mach'Λ ch'ujbi jalijel.

14 Pero jini israelob mach'an ti' ch'Ambeýob isujm. C'Ala wale iliyi ma'ix mi' ch'Am'eñob isujm che' mi' q'uelob jini oniyix bAtrato bA t'an. Che' bajche' ti' moso i ñi' i wut Moisés ti ñoj oniyix, mosol tyo i ni' i wut israelob yubil c'Ala wale iliyi. Como max tyo ba'an mi' ch'Am'eñob isujm cha'an jilemix i ñuclel jini oniyix bA mandar. Cha'an jach ti Cristo ch'ujbi i ch'Ambeñob isujm cha'an tsa'ix jili i c'AJnibal oniyix bA mandar. 15 C'Ala wale iliyi che' mi' q'uelob jini t'an ts'ijbubil bA cha'an Moisés, jini israelob ma'ix mi' ch'Am'eñob isujm. Che' bajche' bej macal tyo i pusic'al yubil.

16 Pero che' an majch mi' ch'ujbin Cristo mi quejel i ch'Am'eñob isujm. Mi loc'santyel i maJquil i pusic'al yubil.

17 Lac Yum jiñlach jini Ch'ujul bA i Ch'ujlel Dios. Ba'ical jach an Ch'ujul bA i Ch'ujlel lac Yum tsa'ix cojliyob.

18 Jin cha'an joñonla cha'an ma'ix i mosil i ni' lac wut che' bajche' espejojonla yubil mu' bA i choque' majlel i yAñal i ñuclel lac Yum. Che' jini más añonla che' bajche' Cristo como jujunyaj che' mi' nijcabeñonla lac pusic'al mi lac bej q'uexyayel majlel. Mi' bej más aq'ueñonla i ñuclel Cristo. ChA'ach mi' yAq'ueñonla la cajñel lac Yum. Jiñlach jini Ch'ujul bA i Ch'ujlel Dios.

4 ¹ Como cha'an añlach i ñuclel i t'an Dios quic'ot ma'ix ch'AJyemon lojon. Como cha'an ti yutlel i pusic'al Dios ti yAq'ueyon lojon tic wenta jini troñel ti subol i t'an.

2 Ma'ix mi lojon c saj cha'len jini quisintic bA ti melol mu' bA i cha'len ti mucul yañob' bA. Ma'ix mi lojon c jop' c lotin quixtyañu. Ma'ix mi lojon c xAc'tyun i t'an Dios ti yambA mach'Λ wen bA t'an. Pero jini jach mi lojon c sube' jini melel bA t'an. Dios yujil isujm cha'an pejtyeýel quixtyañu ch'ujbi i yale' ti' pusic'al weñlach mi lojon c cha'len.

3 Pero mi mach tsiquilel i sujmllel jini t'an cha'an laj cotyAntyel chAncol bA lojon c sube', mucul jach cha'an jini mu' bA quejel i majlel i ñusan wocol cha'an ti caj i mul.

4 Como i dios jini i cha'año' ba mulawil, jini xiba, mi' muts'eñob i wut yubil jini mach ba ba'an mi' ch'ujbiñob Dios che' mi' mac'yalbeñob i ch'am'eñob isujm.

Ma'ix mi' q'uelbeñob i ñuclel Cristo mu' ba i tsictiyel ti' t'an. Cristo jiñlach Dios ti i bac'tyal.

5 Mach joñonic mic tyaj c ba ti t'an che' muc'on lojon ti subt'an. Pero mi lojon c sube' lac Yumach Jesucristo. Muc' jach lojon c sub lojon c ba ti ajtroñelon lojon la' cha'an cha'an ti' p'untyayonla Jesús.

6 Como jini jach ba Dios tsa' ba yac'la ti ts'ajyel q'uin ti ic'jowan ba mulawil ti ñoj oniyix ti yac'la ti tsictiyel i sac'lel ti lac pusic'al cha'an lac ña'tyan i ñuclel Dios tsiquil ba ti Jesucristo.

Ma la cajñel cha'an mi lac ch'ujbin Dios

7 Dios ti yalq'ueyon lojon tic wenta jini ñuc ba troñel cha'an c sube' i t'an. Lac bac'tyal che' bajche' p'ejt melel jach ba ti lum. Che' lumon jachla tsiquil che' jini tyalem ti Dios jini ñoj ñuc ba i p'atyalel mu' ba i tsictiyel che' muc'on lojon ti troñel. Mach lojon c bajñel c p'atyalel como i p'atyalel Dios mij camben como lumon jachla yubil.

8 Aunque joy corrajlibilon lojon yubil ti cabal wocol pero bej añlach bajche' mi lojon c loq'uel. Aunque ma'ix mi lojon c ña'tyan bajche' mi quejel yujtyel pero xuc'ul lojon c pusic'al.

9 Aunque mi' tyac'lañon lojon pero ma'ix mi' clyon lojon Dios. Aunque mi lojon cajts'el ti lojon j contra pero ma'ix mi lojon c sajtyel.

10 Ba'ical jach mi lojon c majlel babalq'uen an majch i tsansañon lojon che' bajche' ti' ñusa wocol ti' bac'tyal lac Yum Jesús je'el. Cha'ach mi yujtyel cha'an mi tsictiyel an i p'atyalel Jesús lojon quic'ot cha'an mi' bej cañltyañon lojon.

11 Ti bele' ora chancel lojon cac' c ba ti sajtyel yubil cha'an ti caj Jesús cha'an mi tsictiyel i p'atyalel Jesús che' mi' bej cotyañon lojon.

12 Che' chancel lojon c sube' i t'an Dios chancel lojon c bej caljq'uel ti sajtyel

yubil cha'an ti lojon c tyac'lantyel. Pero mi loq'uel ti la' wenlel como tsa'ix la' tyaja la' cuxtyalel mach'la yujil jilel ti' caj.

13 Mi lojon c ch'ujbin che' bajche' mi yal jini Ts'ijbubil ba i T'an Dios ba' mi yale': Tic ch'ujbi. Jin cha'an tic cha'le t'an, che'en. Cha'ach joñon lojon je'el. Mi lojon c ch'ujbin, mi lojon c cha'len t'an je'el.

14 Como la cujil isujm Dios tsa' ba i tyeche loq'uel lac Yum Jesús ba'an sajtyemo' ba che' yic'ot Jesús mi quej i tyejch isañonla loq'uel ya' ba'an sajtyemo' ba je'el che' bajche' ti tyejchi loq'uel Jesús. Mi quejel i motin palyonla majlel ti i tyojel.

15 Pejtyelel ili wocol tyac tsa' ba c ñusa tic ñusa cha'an la' wenlel. Cha'an cablob mi' yalq'uentyel i yutslé Dios, cablob mi' tyajob i cuxtyalel. Cablob je'el mi quejel i subeñob Dios wocox i yala cha'an mi tsictiyel i ñuclel Dios.

16 Jin cha'an ma'ix ba' ba ora mi lojon c lujb'an ti i troñel Dios. Aunque chancox i jilel majlel i p'atyalel lojon c bac'tyal pero lojon c pusic'al mi' bej ch'ejl'an ti jujump'ej q'uin.

17 Como ma'ix ñoj wocol lac wocol yubil chancel ba lac ñusan wale iliyi. Como ñumel jach muc' ili wocol wale iliyi. Mi' cotyañonla lac tyaje' ñoj cabal ba lac ñuclel mu' ba la caq'uentyel mach ba ba'an mi saj jilel.

18 Pero ma'ix mi lojon c bej pensalin jini wocol wa' ti mulawil. Mi lojon c ña'tyan jini c'otyajax ba mu' tyo ba quejel laj q'uele' ya' ba'an Dios. Como jini chancel ba laj q'uele' wa' ti mulawil mi quejel i jilel. Pero jini mu' tyo ba quejel laj q'uele' ya' ba'an Dios ma'ix mi quejel i jilel. Mi jalejel ti bele' ora.

5 ¹ La cujil che' mi jilel lac bac'tyal an yamba mu' ba quejel la caq'uentyel ti Dios ya' ti panchan. Mach melelic ti c'abal. Mach yujilic jilel. Como ili lac bac'tyal yujil ba jilel lajal yic'ot otyot mu' ba i jilel.

2-3 Che' je'el che' wa' tyo añonla ti ili lac bac'tyal ch'ajyem mi la cubin como

wersa la com la caq'uentyel jini mu' ba quejel laj c'an ti ajñel ya' ti panchan cha'an añlach i yajñib lac ch'ujlel ti bele' ora.

4 Che' wa' tyo añonla ti ili lac bac'tyal ch'ajyemonla che' mi laj c'ajtisan jini mu' tyo ba quejel la caq'uentyel. Mach cha'anic jach la com laj c'aye' ili tsucul ba lac bac'tyal pero la com la cajñel ti jini tsiji' ba lac bac'tyal cha'an mi q'uextyal yel ili laj cuxtyalel yujil jilel ti jini mach'la yujil jilel.

5 Dios ti' chajrabeyonla lac pusic'al cha'an lac tyaje' jini tsiji' ba lac bac'tyal. Tsa'ix i wa' aq'ueyonla Ch'ujul ba i Ch'ujlel Dios cha'an mi tsictiyel an tyo yamba mu' tyo ba quejel la caq'uentyel.

6 Jin cha'an bej ñuc lojon c pusic'al. Lojon kujil isujm che' max tyo mi lojon cajñel ti jini tsiji' ba c bac'tyal mu' ba quejel la caq'uentyel max tyo c'otyemonla ba'an lac Yum.

7 Xuc'ul mi lojon cajñel cha'an ti jini mu' ba lac ch'ujbin mach cha'anic ti jini mu' ba laj q'uele' wa' ti mulawil.

8 Pero ñuc lojon c pusic'al. Más com lojon j c'aye' ili lojon c bac'tyal cha'an mi lojon cajñel ya' ba'an lac Yum.

9 Jin cha'an che' añon tyo lojon ti ili c bac'tyal o mi mach añon lojon ti ili lojon c bac'tyal pero mi lojon c jop' c bej cha'len jini mu' ba i mulan lac Yum.

10 Como ti pejtyelelonla wersa mi quejel laj c'otyel ya' ba' mi quejel lac mel lac ba ti' tyojlel Cristo cha'an mi la caq'uentyel lac tyojol ti jujuntiquilonla che' bajche' ti lac cha'le mi wen o mi mach wen ti lac cha'le che' wa' tyo añonla ti ili lac bac'tyal.

**T'an cha'an lac tyaje' i ñlach'tyalel
lac pusic'al**

11 Mi lojon c jop' c suben quixtyañujob cha'an i ch'ujbin Dios cha'an mi cotyantyel como mi lojon c bac'ñan lac Yum. Como kujil lojon tyal i yorojlel melojel. Yujil isujm Dios bajche' añon lojon. Mi cal mi la' ña'tyan ti la' pusic'al cha'an ti pejtyel lojon c pusic'al mi lojon c cha'liben i troñel Dios.

12 Ma'ix mi lojon c cha' tyaj c ba ti wen ba t'an cha'an com jach lojon c chan isan c ba. Pero chancel caq'ueñetla la' wubin c'ajacña ba la' woj cha'an ti joñon lojon. Cha'an je'el ch'ujbi la' tyajon lojon ti wen ba t'an ti' tyojlel jini mu' ba i lolon pasob i ba ti más ñucob cha'an bajche' yilal mi' cha'leñob. Pero ma'ix xuc'ulob ti i pusic'al.

13 Mi' lolon q'uelon lojon che' bajche' mi locojon jini yaño' ba cha'an chancel lojon c wen cha'liben i troñel Dios. Mach locojonc lojon como jiñlach cha'an la' wenlel.

14 I p'untyaya Cristo mi' nijcabeñon lojon c pusic'al cha'an c cha'liben lojon i troñel. Como kujil lojon isujm ti sajti juntiquil cha'an pejtyelel quixtyañujob. Che' jini che' bajche' tsa'ix lu' sajtiyob ti pejtyelelob yubil.

15 Cristo ti sajti cha'an pejtyelel quixtyañujob. Mach yom i yajñel cha'an i bajñel yom jach i wenlel jini tsa' ba i tyajayob i cuxtyalel. Yom i yajñel cha'an mi' tsictisaben i ñuclel Cristo tsa' ba sajti, tsa' ba cha' tyejchi loq'uel ba'an sajtyemo' ba cha'añob.

16 Jin cha'an ma'ix mi lojon c bej pensalin bajche' an i ñuclel quixtyañu ti tyojlel Dios cha'an jach ti caj i ñuclel wa' ti mulawil. Aunque ma'an i ñuclel Cristo ti lojon c lolon pensali ti yamba ora pero wale iliyi mach che'ic mi lojon c bej pensalin cha'an Cristo.

17 Jin cha'an majchical jach ochem ti i t'an Cristo tsijib melelix ba quixtyañu yubil. Tsa'ix i lu' c'aya i cha'len jini mach'la wen ba tsa' ba i cha'le wajali. Lu' tsijibix mi majlel ti pejtyelel i cha'libal yic'ot i pensal.

18 Lu' i melbalach Dios che' mi' tsijibtisabeñonla lac pusic'al. Dios ti yaq'ueyonla la cajñel ti uts la quic'ot Dios cha'an ti Cristo. Ti yaq'ueyon lojon tic wenta cha'an mic sube' i t'an cha'an i lu' tyajob i ñlach'tyalel i pusic'al yic'ot Dios.

19 Dios an ti Cristo che' ti yuts isabe i pusic'al quixtyañujob che' ti' q'uele ti tyoj. Dios ti yaq'ueyon lojon tic wenta

cha'an mi lojon c sube' jini t'an cha'an mi yuts an i pusic'al quixtyañu yic'ot Dios.

20 I q'uexolonla Cristo. Che' bajche' Dios i bajñel chancol i subeñetla ti wocol t'an che' mi' c'Ambeñon lojon c ti'. Jin cha'an mi lojon c subeñetla ti wocol t'an cha'an cha'ach yom Cristo: La' uts isabentiquetla la' pusic'al ti Dios, cho'on lojon, che' yom i subeñetla Dios.

21 Cristo mach'an ti saj cha'le mulil. Pero cha'an ti caj lac mul che' bajche' xmulil ti' q'uele Dios Cristo. Cha'an mi lac tyem ajñel la quic'ot Cristo Dios mi' q'uelonla ti tyoj cha'an che' yom i pusic'al Dios.

6 ¹ Bej chancol ti t'an Pablo. Ti yala: Cha'an motin ajtroñelon lojon i cha'an Dios mi lojon c subeñetla ti wocol t'an cha'an mach'an mi la' lolon ñusan i yutslel Dios.

2 Como Dios mi yale' ti Ts'ijbubil ba i T'an:

Ti yorojlel cutslel tic
ñach'tyabeyetla la' t'an.

Ti yorojlel cotyaya tij cotyayetla.

Che' ti yala Dios. Jin cha'an wale iliyi i yorojlelach i yutslel Dios. I yorojlelach la' cotyantyel.

3 Mach'an mi lojon c cha'len mach'la wen cha'an ma'an majch mi' tyaje' ti t'an lojon c troñel.

4 Pero com lojon c pas'eñob wen ba ajtroñelon lojon i cha'an Dios cha'an ti pejtyelex mu' ba lojon c cha'len. Com lojon c pas'eñob mi ajtroñelon lojon i cha'an Dios cha'an ti bajche' mi lojon j cuche' ti wen che' mi lojon quilan wocol yic'ot che' wera an tyo cha' ba yes yom lojon c cha'an yic'ot che' mi lojon c ñusan ñoj tsats tyac ba c wocol.

5 Tsa'ix i jatsa'yoñob. Tsa'ix c'ajchiyon lojon. Tsa'ix lojon quilan lojon j contrajintyel. Tsa'ix lojon c cha'le wen tsats tyac ba troñel. An mach'an ti lojon c cha'le walyel. Tsa'ix lojon c ñusa wi'ñal.

6 Mi lojon c pas'eñob cha'an tyoj mi lojon cajñel. Mi lojon c pas'eñob cha'an mi lojon c ch'am'en i sujmllel. Mi lojon c pas'eñob cha'an chancol lojon j cuche' ti wen. Utson lojon. Mi lojon c pas'eñob an

lojon quic'ot Ch'ujul ba i Ch'ujlel Dios. Mi lojon c pas'eñob cha'an mi lojon c yoque p'untyañob.

7 Mi lojon c pas'eñob wen ba ajtroñelon lojon i cha'an ba Dios cha'an ti jini melex ba t'an mu' ba lojon c sube'. Yic'ot cha'an i p'atyalel Dios lojon quic'ot.

Yic'ot cha'an chajrabilon lojon cha'an c cha'len wera ti contrajiya che' chucul lojon c cha'an tic ñoj jini tronijib yubil mu' ba la calq'uentyel che' tyoj añonla. Tic ts'ej mu' ba j c'an j cotyan c ba.

8 An jini chancol ba i q'uelon lojon ti ñuc. An yamba ma'ix mi' q'uelon lojon ti ñuc. An jini chancol ba i tyajon lojon ti wen ba t'an. An yamba chancol ba i tyajon lojon ti mach'la wen ba t'an. An jini chancol ba i q'uelon lojon ti xlotyon lojon. An yamba chancol ba i q'uelon lojon bajche' quixtyañu mu' ba i sub melex ba t'an.

9 An jini mach'la ba'an mi' cañon lojon mi' cha'len. Pero an yamba mi' wen cañon lojon mi' cha'len. An tyac mi lojon caljq'uel ti sajtyel yubil pero bej cuxul mi lojon cajñel. Mi lojon c ts'itya' ñusan wocol cha'an lojon c tyoj isantyel pero ma'ix mi lojon c tsansantyel.

10 Aunque ch'ajyemon lojon pero bej tijicña mi lojon cubin ti lac Yum. Aunque p'ump'uñon lojon pero an cabal chumulo' ba yubil cha'an ti caj tic sube lojon i t'an Dios. Aunque ma'ix cha' ba an lojon c cha'an pero lu' añach lojon c cha'an ti pejtyelex cha' ba yes an yubil.

11 Hermañujob, corintojob, mi lojon c pejcañetla ti wen tsiquil ba t'an cha'an cha' ba mi lojon c pensalin tic pusic'al como mi lojon c wen p'untyañetla.

12 Mi lojon c yoque p'untyañetla. Jatyetla mach'la ba'an mi la' wen p'untyañon lojon.

13 Mic subeñetla ti wocol t'an che' bajche' juntiquil tyatyal mi' pejcan yalobilob cha'an lajal yom mi la' p'untyañon je'el che' bajche' mic p'untyañetla.

I templojonla jini cuxul ba Dios

14 Mach yom mi la' motin ajñel ti junmujch' yic'ot jini mach'la ba'an ochem

ti' t'an Dios. Como che' mach lajalic ochem ti' t'an Dios cha'tiquilob mach wen mi quejel i yajñelob. Che' bajche' mach wen mi' cha'len troñel cha'cojt animal motin caxhalo' ba' ti troñel che' mach ba' mismo i pi'alic. Mach ch'ujbi i motin ajñel cha' ba' wen yic'ot jini mach'la wen. Mach ch'ujbi ajnic sacjaman ba' ba' ic'jowan.

15 Mach ch'ujbi i saj ajñel Cristo yic'ot Satanás. Mach ch'ujbi i lajal pensalin jini ochem ba' ti' t'an Dios yic'ot jini mach'la ba'an mi' ch'ujbiben i t'an Dios.

16 Mach ch'ujbi i ch'ujutisan melez jach ba' dios jini chancel ba' i yoque ch'ujutisan Dios. Jatyetla i templojetixla jini cuxul ba' Dios. Como Dios i bajñel ti yala:

Mi quejel cajñel yic'otyob. Mi quejel c cha'len xambal ba'añob. I Diosoñob mi quejel cajñel. C cha'añob mi quejel i yajñelob.

17 Jin cha'an lac Yum ti yala je'el: Loq'uen ya' ba'añob jini mach'la ba'an ochemob ti' t'an Dios. Najt isan la' ba' ya' ba'añob. Ma' mi la' cha'len jini mach'la wen. Che' jini mi' cotsañetla tic cha'añetla.

18 La' tyatyon mi quejel cajñel. Calobiletla mi quejel la' wajñel. Cha'ach mi yal lac Yum mach'la ba'an i p'isol i p'alyalel.

7 1 Jin cha'an p'untyabilet ba' la hermañujob tsa'ix i wa' ala' Dios mi quejel i cotyañonla. Jin cha'an la' lac calñatyan lac bac'tyal yic'ot lac pusic'al cha'an mi la cajñel ti sac cha'an ma'ix mi' bibi'tisañonla jini mach'la wen ba'. Cha'an chancox lac q'uel ti ñuc Dios yom mi lac yoque aq'uen lac ba' Dios cha'an mi la cajñel ti sac.

Ti' q'uexeyob i pensal jini hermañujob ti Corinto

2 P'untyañon lojon. Ma'ix ti lojon c cha'le mach'la wen ya' ba' añetla. Ma'ix majch ti lojon c yasa ti mulil. Ma'ix ti lojon c lotiyetla.

3 Como ma'ix chancel cale' mi añach la' mul. Como tsa'ix c wa' subeyetla mi cuxulon lojon o mi ti sajtiyon lojon la' wic'ot pero mic bej p'untyañetla.

4 Ma'ix mij quisnin c tyajetla tic t'an como cujilach isujm chancox la' ch'ujbibeñon c t'an. Tijicña mi cubin mic tyajetla ti wen ba' t'an. Che' chancox lojon quilan wocol chac ch'ejlon tyo. C'ajacña coj mi cubin cha'an ti jatyetla.

5 C'ala' ti juliyon lojon wa' ti pañimil Macedonia ba' i c'aba' c'ala' wale iliyi ma'ix ti lojon c'aja coj. Como tsa'ix lojon c ñusa ñoj tsats tyac ba' c wocol ba'ical ti ñumiyon lojon. Joy corrajlibilon lojon ti lojon contra yubil. Ti lojon c cha'le pensal cha'añetla je'el.

6 Pero Dios mu' ba' i ñuc isabeñob i pusic'al jini ch'ajyemo' ba', ti ñuc isabeyon lojon c pusic'al cha'an ti pasi tyalel Tito wa' ti Macedonia.

7 Mach cha'anic jach ti juli Tito tijicña c pusic'al pero cha'an tijicña i pusic'al Tito je'el cha'an ti jatyetla. Ti' subeyon lojon wen la' wom la' cha' q'uelon lojon. Ti' subeyon Tito cha'an ch'ajyemetla. Chancel la' wen cha'len pensal cha'añon. Cha'an ti jini t'an más c'ajacña coj ti cubi.

8 Aunque ch'ajyem ti la' wubi cha'an ti c'oti jini jun tsa' ba' c ts'ijbubeyetla pero wale iliyi ma'ix bej ch'ajyemon mi cubin cha'an ch'ajyemetla che' ñac ti la' q'uele cun. Aunque poj ch'ajyemon ti cubi che' ñac tic ña'tya' ti yalq'uetla la' ch'ajyemlel jini jun tsa' ba' c'oti. Pero ma'ix jal ti la' wubi la' ch'ajyemlel.

9 Wale c'ajacña coj mach cha'anic ch'ajyem ti la' poj ubi pero cha'an ti la' q'uextya' la' pensal cha'an la' clye' jini mulil. Ti la' ñusa ti wen la' ch'ajyemlel che' bajche' mi' mulan Dios. Mach'an ti lojon c yasa'yetla ti caj jini cun.

10 Como lac ch'ajyemlel mu' ba' lac ñusan ti wen che' bajche' mi' mulan Dios, mi yalq'ueñonla laj q'uextyan lac pensal laj clye' lac mul cha'an lac tyaje' laj cotyantyel. Mach yom cha' ch'ajyemonla ti caj. Pero lac ch'ajyemlel tyalem jach wa' ti mulawil che' mach ochemonla ti'

t'an Dios mu' jach i yac'onla ti sajtyel.
 11 Ti la' ñusa la' ch'ajyemlel bajche' mi' mulan Dios. Q'uele awilan, wale weñach ti loq'ui. Ti la' yoque ch'amla ti la' wenta la' t'yoj isan jini tsa' bā i cha'le mulil. Ti la' tsictisabeyon bajche' ti' cha'le cha'an mach'an la' mul ti la' pejtyeel. Ti la' mach'q'uelbe i mul. Ti la' cha'le baq'uen. Ti wi'il la' wom la' cha' q'uelon. La' wom la' wāq'uen i ñusan wocol cha'an ti caj i mul jini tsa' bā i cha'le mach'ā wen. Cha'an ti pejtyeel jini, tsa'ix la' tsictisabeyon aunque an i mul juntiquil pero ma'ix la' mul ti la' pejtyeel.

12 Che' jini, che' ñac tic ts'ijbubeyetla jini jun mach i bajñel tic pensali jini am bā i mul mi jinic jini tsa' bā i yilā wocol cha'an ti caj, pero tic ts'ijbubeyetla jun cha'an Dios mi' tsictisabeñetla chāncox la' wen p'untyañon che' mi la' ch'ujbibeñon lojon c't'an.

13 Jin cha'an tsa'ix ñuc isabentiyon lojon c pusic'al. Pero más c'ajacña tyo lojon coj che' ti quila tijicña i pusic'al Tito. Ti la' pejtyeel tsa'ix la' tijicñāsabe i pusic'al.

14 Ma'ix quisintic ti cubi cha'an tsa'ix c wā sube Tito cha'an bajche' añetla. Como melelach pejtyeel jini tsa' bā lojon c subeyetla. Chā'ach je'el melelach pejtyeel wen bā tsa' bā lojon c sube Tito cha'añetla.

15 Tito mi' más p'untyañetla che' mi' c'ajtisan bajche' ti la' ch'ujbibe i t'an che' ñac ti' subeyetla bajche' yom mi la' cha'len. Ti la' peq'uisā la' bā che' ti la' pāyā ochel. Ti la' bāc'ñā machic wen mi ujtyel.

16 C'ajacña coj mi cubin cha'an cujil isujm mach lolomic jach chāncox j q'ueletla ti wen.

Cabal ti yāq'ueyob majtyan tyaq'uin ti pejtyeel i pusic'al

8 1 Wale hermañujob, com c subeñetla bajche' ti tsictiyi i yutslel Dios ya' ba'añob ochemo' bā ti' t'an Dios ya' ti pañimil Macedonia bā i c'aba'.

2 Aunque ti' ñusayob yoque tsats tyac bā i wocol pero wen c'ajacñayob i yoj. Aunque wen p'ump'uñob pero ti wen

yāq'ueyob i majtyan tyaq'uin che' bajche' mi wen chumulob ti' cha'leyob.

3 Tsa'ix quila bajche' ti ujti. Ti yāq'ueyob bajche' yonlel ch'ujbi i yāq'uen. Ti más ac'ayob bajche' ch'ujbi i yāq'uen yubil cha'an chā'ach ti bajñel mula i yāc'ob.

4 Ti' c'ajtibeyon lojon ti wocol t'an cha'an mi lojon caq'ueñob cha'an i cotyan hermañujob ti tyaq'uin je'el.

5 Más on ti yāq'ueyob bajche' ti lojon c pensali mi quejel i yāq'uen tyaq'uin. Ñaxan ti yāq'ueyob i bā lac Yum. Ti wi'il ti yāq'ueyoñob i bā cha'an i cotyañon lojon ti troñel cha'an jiñach bajche' yom Dios.

6 Cha'an ti caj chā'ach ti yāq'ueyob ofrenda ti lojon j c'ajtibe Tito cha'an i tyālel ya' ba' añetla cha'an la' ts'actisan la' loc'san jini majtyan tyaq'uin tsa' bā la' wā ña'tyā la' loc'san che' ñac Tito ti tyejchbeyetla la' loc' jini ofrenda ti yambā jabil.

7 Wen c'ajquemetla ti pejtyeel wen tyac bā troñel: Mi la' wen ch'ujbin Dios. Wen la' wujil cāntisa. Wen mi la' ch'am'en i sujmllel. Ti pejtyeel la' pusic'al mi la' cha'len cotyaya. Mi la' wen p'untyañon lojon. Wale iliyi yom tyo mi la' wen loc' ofrenda je'el.

8 Ma'ix mic wersa xiq'uetla cha'an la' loc' ofrenda. Com jach mi la' ña'tyan ti pejtyeel i pusic'al ti' cha'leyob cotyaya jini ya' bā año' bā ti Macedonia che' ti yāc'ayob ofrenda. Tsiquilach ti' cha'leyob p'untyaya. Chāncol jach c subeñetla cha'an tsictiyic mi melelach chāncox la' cha'len p'untyaya je'el.

9 Com mi la' ña'tyan i yutslel i pusic'al lac Yum Jesucristo. Aunque wen chumul Jesucristo ti yāc'ā i bā ti ajñel ti p'ump'un cha'an ti' wen p'untyayonla. Cha'an ti caj ti ajni ti p'ump'un Jesucristo mi la cajñel ti chumul yubil.

10 Mic subeñetla bajche' mic pensalin cha'an la' wenlel. Weñach bajche' ti queje la' loc' jini ofrenda ti yambā jabil. Mach cha'anic jach ti la' loc' ofrenda pero ti pejtyeel la' pusic'al ti la' much'qui tyaq'uin.

11 Wale yom mi la' jolontisan la' loc' jini

ofrenda ti pejtyelex la' pusic'al che' bajche' ti queji la' loc' ti pejtyelex la' pusic'al ti yambal jabil. Jiñach che' bajche' yonlel an yom mi' la' ts'itya' loc' cha'an la' wac' ofrenda mi on o mi mach onic la' cha'an.

12 Mi an majch ti pejtyelex i pusic'al yom i yalq'uen majtyan tyaq'uin aunque ma'ix cabal i cha'an, weñach mi' yilan Dios. Yom mi la caq'uen ts'itya' bajche' yonlel an lac cha'an. Ma'ix más i yonlel mi' c'ajtin Dios bajche' an lac cha'an.

13 Mach yom mi la' ñusan wocol cha'an ti caj chancoc la' cotyañob yaño' ba ti cha ba yom i cha'añob mi ma'ix jasal la' cha'an.

14 Pero yom mi laj cotyan yaño' ba cha'an junlajal mi yajñel la quic'ot. Wale iliyi añach la' cha'an cha'an la' cotyan jini an tyo ba yom i cha'añob. Ti yambal ora che' an i cha'an ch'ujbi i cotyañetla che' an tyo yom la' cha'an. Che' jini junlajal mi la' wajñel ti wen.

15 Che' bajche' an ti Ts'ijbubil ba i T'an Dios: Jini am ba cabal i cha'an ma'ix cha ba ti' c'ayle i cha'an. Jini am ba ts'itya' jach i cha'an ma'ix cha ba yom tyo i cha'an.

Tito yic'ot i pi'al ti troñel

16 Pero wocox i yal Dios, Dios ti yalq'ue i pensalibeyetla la' wenlel jini Tito che' bajche' mic pensalibeñetla la' wenlel je'el.

17 Ti' ch'amal ti' wenta Tito cha'an i tyalel ya' ba' añetla che' bajche' tic wa pensali cha'an mi tyalel. Pero cha'an i bajñel mi' wen pensalin la' wenlel, wale yom i bajñel tyalel i q'ueletla cha'an ch'alach ti' bajñel pensali.

18 Che' yic'ot Tito chancoc lojon c choque' tyalel juntiquil hermañu chancoc ba i yajlel ti wen ba t'an cha'an ti wen ba i troñel ti pucol jini t'an cha'an laj cotyantyel. Chancoc i tyajtyal ti wen ba t'an ti hermañujob ti pejtyelex templo tyac.

19 Mach jinic jach cha'an ti wen ba i troñel pero ochemo' ba ti' t'an Dios ti yajcayob jini hermañu cha'an mi majlel

lojon quic'ot che' mi lojon c ch'ame' majlel jini lac ofrenda tsa' ba lac much'qui cha'an mi tsictiyel i ñuclel lac Yum. Cha'an mi tsictiyel je'el ti pejtyelex la' pusic'al mi la' cotyan yaño' ba.

20 Com lojon c pi'al ti xambal cha'an ma'an majch ch'ujbi i tyejche' t'an cha'an ti jini cabal tyaq'uin chancoc ba lojon c ch'ame' majlel.

21 Como chancoc lojon c jop' c cha'len ti wen jini much'quiya tyaq'uin. Mach i bajñelic cha'an mi tsictiyel ti' tyojlel lac Yum mi wen ti lojon c cha'le pero cha'an mi tsictiyel ti' tyojlel pejtyelex quixtyañujob je'el.

22 Mi quejel lojon c choque' majlel je'el yic'otyob yambal juntiquil la quermañu. Tsa'ix lojon cabal quil la' cha'libe i troñel Dios ti pejtyelex i pusic'al. Pero wale iliyi más tyo ti pejtyelex i pusic'al cha'an chancoc i pensalin mi quejel la' más wen ac' jini ofrenda cha'an cotyaj.

23 Mi an majch mi' c'ajtibeñetla cha'an jini Tito, subeñob cha'an c pi'al ti troñel Tito. Mi' cha'len troñel quic'ot cha'añetla. Mi an majch mi' c'ajtibeñetla cha'an jini yambal hermañujob, subeñob chocolob tyalel cha'an ti ochemo' ba ti' t'an Dios ti templo tyac. Mi yac'ob ti ñuc Cristo, che'etla.

24 Jini cha'an pas'eñob Tito yic'ot i pi'al ti xambal cha'an chancoc la' wen p'untyañob, cha'an mi tsictiyel ya' ba'an ochemo' ba ti' t'an Dios ti templo tyac. Tsiquilach che' jini añach cha ba och ti lojon c tyajayetla ti wen ba t'an como tijicñayon lojon cha'an ti jatyetla.

Ofrenda cha'an hermañujob

9¹ Mach wersa mic ts'ijbubeñetla cha'an c xiq'uetla la' walq'uen ofrenda hermañujob ochemo' ba ti' t'an Dios.

2 Como cujil isujm la' wom la' walq'ueñob i cotyantyel ti pejtyelex la' pusic'al. Chancoc c bele' subeñob jini año' ba ti pañimil Macedonia ba i c'aba' c'ajacña coj cha'an jatyetla añet ba la ti pañimil Acaya ba i c'aba'. Chajpabiletixla c'alal jump'ej jab wale cha'an la' walq'uen jini

cotyaj. Jin cha'an cabal jini año' ba ti Macedonia tsa'ix i ch'ejlisayob i ba cha'an i cha'len cotyaj je'el cha'an ti caj ti pejtyelex la' pusic'al chancox la' wac' ofrenda jatyetla je'el.

³ Pero chancel tyo c choque' tyalle ya' ba' añetla jini hermañujob cha'an i c'ajtisabeñetla cha'an jini ofrenda tsa' ba la' wa ala mi quejel la' loc'. Cha'an melelach tsa'ix la' loc'o ofrenda che' bajche' tic wa subeyob mi quejel la' loq'ue'.

⁴ Ame majlic hermañujob loq'uem ba ti Macedonia mi c'otyel quic'ot che' mi lojon c ñumel majlel cha'an mic ch'ame' majlel jini ofrenda. Mi quejel i q'uele' max tyo ba'an ts'acal jini la' wofrenda. Quisintic mi quejel lojon cubin che' tsa'ix c lolon wa ala chajrabletix la. Más quisintic tyo mi quejel la' wubin mi max tyo ti la' loc'o.

⁵ Jin cha'an tic pensali c'ajñibal i ñaxan ñumel jini hermañujob i jula' añetla. Che' jini mi' c'ajtisabeñetla la' loc' jini ofrenda tsa'ix ba la' wa ala mi quejel la' loc'. Che' jini tsa'ix la' wa loc'o jini ofrenda che' mi lojon j c'otyel. Tsiquilach i yutslel la' pusic'al la' cha'len cotyaj che' jini. Tsiquil ma'ix mi lojon c xiq'uetla pero ti la' bajñel pusic'al ti la' wac'la jini ofrenda.

⁶ C'ajtisanla jini wa albil ba t'an mu' ba yalob: Jini ts'itya' ba mi rac', ts'itya jach mi quejel i c'aje' je'el. Jini on ba mi rac'ue' on mi quejel i c'aje' je'el, che'ob.

⁷ Jujuntiquil yom i yac' majtyañal che' bajche' ti' pensali ti' bajñel pusic'al. Mach ti ch'ajyemlelic i pusic'al mi cha'anic ti xijq'ui mi wersa yac' ofrenda. Pero Dios mi' p'untyan jini mu' ba i yac' ti pejtyelex i pusic'al.

⁸ Dios ch'ujbi i yalq'ueñetla i yonlel cha ba yes yom la' cha'an cha'an ti yutslel i pusic'al. Che' jini, bej an pejtyelex cha ba yom la' cha'an yic'ot aflach cabal cha'an la' cotyan año' ba ti cha ba jach ba cotyaj je'el.

⁹ Che' bajche' mi yal ti Ts'ijbubil ba i T'an Dios:

An jini ti pejtyelex ba i pusic'al mi

yalq'uen cabal i majtyan p'ump'uño' ba.

Mach ñajayic i cha'an Dios jini wen ba i cha'libal.

¹⁰ Dios mi yalq'ueñonla pac' cha'an lac rac'ue' yic'ot wen ba c'ajbal cha'an laj c'uxe' yic'ot cha'an lac cha' rac'ue' yamba je'el. Ch'alach je'el mi yalq'ueñonla pejtyelex cha ba yom ba cha'an la' rac'ue' yubil che' mi la' wac'uen año' ba cha ba yom i cha'an. Dios mi yalq'uen i colel je'el tsa' ba la' rac'la wen ba la' cha'libal yubil cha'an mi la' c'aje' je'el wen tyac ba la' cha'libal yubil che' mi la' cha'len cotyaj.

¹¹ Che' añlach cabal cha ba an la' cha'an ch'ujbi la' bej aq'uen cabal i majtyan año' ba ti pejtyelex la' pusic'al. Cabal hermañujob mi quejel i suben Dios wocox i yala cha'an ti jini ofrenda mu' ba la' choque' majlel quic'ot lojon.

¹² Como che' mi la calq'ueño b i cotyantyel, mach i bajñel jach chancel la calq'uen cha ba yom i cha'año b jini hermañujob pero chancel la calq'uen cablob i suben Dios wocox i yala.

¹³ Jini hermañujob, mi quejel i subob ñucach Dios. Mi' tsictisabeño b je'el chancox la' wen ch'ujbiben i t'an Cristo cha'an jini cotyaj mu' ba la' choque' majlel. Che' je'el mi' q'uelob ti ñuc Dios cha'an ti cabal ba i majtyan mu' ba la' chobben majlel yic'ot i cha'an año' ba je'el.

¹⁴ Che' jini mi quejel i tyajetla ti oración je'el. Mi quejel i wen p'untyañetla cha'an ti ñoj ñuc ba i yutslel Dios tsiquil ba cha'añetla.

¹⁵ Wocox i yala Dios tsa'ix i yalq'ueyonla yoque ñuc ba lac majtyan mach'la ch'ujbi la cal bajche' an i ñuclel como yoque ñoj ñuc.

An i p'atyalal i t'an Pablo como yajcabil ba ajsubt'an ñumel

10 ¹ Joñon Pablojon. Mi quejel c subeñetla cha'an ti peq'uisa i ba Cristo yic'ot cha'an ti yutslel. Mi yalob wen pec'onix che' ya' año n la' wic'ot pero wen ch'ejlom mic cha'len che' ñajt año n. Che' mi lolon yaloñoño b.

2 Mic subeñetla ti wocol t'an cha'an ma'ix mi la' lolon wáq'ueñon c wersa pas'en cha'tiquil uxtiquiletla mi ch'ejlon che' mi quejel c tiq'uetla che' mi quejel j c'otyel c jula' añetla. Como cha'tiquil uxtiquiletla mi la' lolon al chanconlon jach lojon ti troñel cha'an jach com lojon.

Com c pas'eñob i p'Atyalel c t'an mi cubin cha'an mach'an mi lolon bej tyajon ti' t'an.

3 Melel, quixtyañujon jach lojon je'el pero ma'ix mic jop' cajñel ti tyoj ti lojon c bajñel c p'Atyalel che' bajche' mi lolon jop' i cha'len jini i cha'año' ba' mulawil.

4 Como i tronijib cha'an contrajiya mu' ba' lojon j c'añe' mach i cha'anic ili mulawil. Pero mi lojon j c'añe' p'Atyalel ba' tronijib i cha'an ba' Dios cha'an mi jisantyel i p'Atyalel jini mu' ba' i ma'ctyabeñob quixtyañujob i ch'ujbiñob Dios.

5 Che' jini mi lojon quisan cabal t'an mu' ba' i tyajob ti mach'la wen ba' t'an Dios yic'ot cha' ba' yes mu' ba' yáq'uen i chan isan i ba', mu' ba' i ma'ctyabeñob i ch'ujbiñob Dios. Mi lojon caq'uen ti wenta Cristo tsucul tyo ba' i pensal quixtyañu cha'an mi' ch'ujbiñob Cristo.

6 Chajrabilon lojon caq'uen i xot'e i mul ti pejtyelelob mach ba' ba'an mi' ch'ujbin t'an che' tsa'ix la' yoque ch'ujbi t'an ya' ba' añetla.

7 Jatyetla mi la' lolon pensalin la' q'uele' bajche' an quixtyañu. Mi an majch mi' ña'tyan ti' bajñel pusic'al yoque i cha'añach Cristo yom i ña'tyan i cha'año' lojon Cristo je'el.

8 Aunque chancox c pas c ba' ti ñuc yubil mi la' wubin che' mi cal añach lojon i p'Atyalel c t'an pero ma'ix quisintic mi cubin. Tsa'ix i yáq'ueyon lojon i p'Atyalel c t'an lac Yum cha'an mi la' xuc'tyal, mach cha'an mi la' jisantyel.

9 Mach com mi la' lolon ña'tyan chanco' jach c jop' c bac'tisañetla ti cun.

10 Como mi yalob ti i jun ch'ejl mi' cha'len t'an. P'Atyalel mi' cha'len. Pero che' ya'an, c'un yilal, che'ob. Ma'ix i c'ajñibal i t'an, che'ob. Che' mi' lolon yaloñob.

11 Pero jini mu' ba' i yale' che' bajche' jini, yom i ña'tyan je'el che' bajche' ch'ejlon yubil che' mic ts'ijbun jun che' ñajt año' lojon cha'ach ch'ejlon je'el che' ya' año' la' wic'ot. Cha'ach mi quejel lojon c cha'len tyoj isaya che' bajche' tic ts'ijbubeyetla.

12 Ma'ix mi cal mi ñoj weñon bajche' jini mu' ba' i tyajob i ba' ti wen ba' t'an. Mi lolon lajob i ba' bajche' mi' cha'len lajalob jach ba' i pi'alob. Leco bajche' mi' cha'leñob che' mi' laje' i ba' i ñuclel yic'ot yamba i pi'al.

13 Ma'ix mic sub lojon c ñuclel cha'an ti jini mach'la c t'an ti yubibon lojon. Diosach tsa' ba' pas'eyon lojon ba' jaxal jini troñel tsa' ba' aq'uentiyon lojon tic wenta. Ti yáq'ueyon c cha'len lojon c troñel c'alá ya' ba' añetla ya' ti Corinto.

14 Jin cha'an ma'ix chanco' lojon c más ñumel majlel ba' ti' pas'eyon lojon c troñel Dios como tsa'ix lojon c cha'len troñel ya' ba' añetla. Joñon ñaxan ti c'otiyon lojon ti troñel ya' ba' añetla cha'an lojon c subeñetla i t'an Cristo.

15 Ma'ix mi lojon c sube' lojon c ñuclel ti i troñel ti subt'an yaño' ba' che' bajche' mi lojon c troñelach. Pero mi lojon c pijtyan cha'an mi la' más ch'ujbin cha'an más ch'ujbi lojon c cha'len troñel la' wic'ot. Pero ya' jach mi lojon cha'len troñel ya' ba' ti yáq'ueyon lojon c cha'len troñel Dios.

16 Ti wi'il com lojon c cha'len troñel ya' ti jumpatlel ya' ba' añetla. Che' jini mi lojon c puque' majlel jini t'an cha'an laj cotyantyel. Pero ma'ix mi lojon c tyaje' lojon c ñuclel cha'an ti troñel yaño' ba' ajcantisajob.

17 Mi an majch yom i sub i ñuclel la' i sube' i ñuclel lac Yum.

18 Como ma'ix i ñuclel quixtyañu cha'an i bajñel tyaj i ba' ti wen ba' t'an. Pero añach i ñuclel jini mu' ba' i tyajtyal ti wen ba' t'an ti lac Yum.

Pablo yic'ot jini xlot ba' ajsubt'año' ñumel

11 1 Chanco' tyo ti bej t'an Pablo. Ti yala: Muq'ueic la' poj cuchbeñon cha'an c ts'itya' sub c ñuclel.

Com mi la' poj cuchbeñon ti wen jini t'an.

2 Como mic wen pensalin la' wenlel. Tylalem jini c pensal ti Dios. Tsa'ix c'ac'ayetla Cristo yubil cha'an la' ch'ujbin Cristo. Com c'ac'uetla ti Cristo che' bajche' yoque tsiji' ba xc'alal tsa'ix ba tyaja juntiquil jach ba i ñoxi'al.

3 Mic cha'len baq'uen ame añach bajche' mi la' wac' la' ba ti lotintyel che' bajche' jini lucum jiñach jini xiba ti loti Eva ti wen ba i t'an lolon yubil. Ame ti la' bajñel pensal jach mi la' ñajt isan la' ba ti Cristo cha'an ma'ix mi la' yoque p'untyan Cristo ti pejtye'lel la' pusic'al.

4 Como chancocx la' lolon wen ñach'tyan jini chancol ba i subeñetla yamba cantisa. Chancol i tyalel i lolon subeñetla yamba Jesús yubil mach'la ba'an mic sube' lojon. Mi la' tyaje' yamba i ch'ujlel yubil mach'la ba'an jini tsa' ba aq'uentiyetla ti yamba ora. Mi la' lolon mulan la' ñach'tyan yamba t'an mach'la ba'an jini wen ba t'an cha'an laj coty'antyel tsa' ba la' ñaxan ubi.

5 Chancocx la' lolon tsac'len jini mu' ba i lolon cuyob i ba ti ñoj ñuc ba ajsub't'añob ñumel. Cujil ma'ix más i sajón bajche' jini yaño' ba ajsub't'añob.

6 Aunque ma'ix c'ot'yajax mic cha'len t'an, añach wen ba c ñatyabal. Tsa'ix c bej pas'eyetla añach wen ba lojon c ña'tyabal ti pejtye'lel cha' ba jach tic cha'le ba' añetla.

7 ¿Tsa' ba c cha'le mulil che' ti la' majtyan jach tic subeyetla i t'an Dios cha'an laj coty'antyel? Tsa'ix c peq'uisa c ba yubil cha'an mi la' tyaj la' wenlel.

8 Tic chilbeyob i tyaq'uin yubil jini ochemo' ba ti t'an Dios ti yan tyac ba templo tsa' ba i tyojoyoñob yubil che' ñac ti yalq'ueyon c majtyan. Pero tic tyaja j coty'antyel tsa' ba i yalq'ueyoñob cha'an j c'añe' cha'an c cha'len troñel ya' ba' añetla.

9 Che' ya' añaon ya' ba' añetla ma'ix tij c'ajtibeyetla j coty'antyel mi junticlec che' an cha' ba tyo yom c cha'an. Jini hermañujob tsa' ba juli ch'oyol ba ti pañimil Macedonia ti yalq'ueyon cha' ba i

c'ajñibal c cha'an. Cha'ach tic cha'le cha'an ma'ix mi la' ñusan wocol tij caj. Ma'ix mi quejel j c'ajtiben j coty'antyel ti cha' ba yes yom c cha'an ya' ba' añetla.

10 Mic ña'tyan mic ch'am'en i sujmllel cha'an Cristo. Cha'ach je'el mic ñatyan com ti majtyan jach mic cha'len troñel ya' ba' añetla cha'an bej c'ajacña coj mi cubin. Ma'ix mi quejel j c'ajtin j coty'antyel ti pejtye'lel pañimil Acaya ba i c'aba' cha'an cha' ba yom c cha'an.

11 ¿Chucoch che' muc'on ti t'an? ¿Cha'an ba ma'ix mic p'untyañetla, mi la' wal? Mach jiniqui. Como Dios yujil isujm mic wen p'untyañetla.

12 Pero cha'ach tyo mi quejel c bej cha'len che' ma'ix mij c'ajtin lojon j coty'antyel cha'an cha' ba tyo yom c cha'an ya' ba' añetla che' mi lojon c cha'len sub't'an. Che' ma'ix mi lojon c ch'ame' c tyojol ti sub't'an che' jini mach ch'ujbi i lolon ale' jini yom jach ba i chan isan i ba cha'an lajal muc'on lojon ti troñel.

13 Pero lot muc'ob che' mi lolon al yajcabil ba ajsub't'añob ñumel. Xlotyob. Mu' jach i cuyob i ba ti yajcabilo' ba ajsub't'añob ñumel i cha'an ba Cristo.

14 I tyalelach che' xlotyob. Como Satanás je'el mi' cuy i ba ti ajtroñel i cha'an Dios tylalem ba ti panchan mu' ba i pase' i sac'lel.

15 Jin cha'an i tyalelach cha'ach mi' cha'len quixtyañujob je'el mu' ba i cha'liben i troñel Satanás. Mi' lolon pas'e' i ba ti wen ba quixtyañu mi' cha'len. Mi quejel i yalq'uentyel i xot' i mul.

I wocol Pablo cha'an yajcabil ba ajsub't'an ñumel

16 Pablo ti yala: Mic cha' subeñetla: Mach yom an majch mi' lolon ña'tyan mach'an mic ña'tyan pañimil. Pero mi cha'ach mi' lolon pensalin ti' pusic'al, la' tyo c pejcañetla che' bajche' mach'an mic ña'tyan pañimil cha'an mic poj pas c ba ti ñuc yubil.

17 Ma'ix mi cal che' bajche' jini cha'an cha'ach ti xiq'uiyon c'le' lac Yum. Pero

che' bajche' mach'an mic ña'tyan pañimil muc'on ti t'an che' mic ts'itya' pas c ba ti ñuc.

18 Melel an cabal mu' ba i chan isan i ba cha'an ti caj cha ba mi yujtyel wa' ti mulawil. Cha'ach joñon je'el mi quejel c poj pas c ba ti ñuc.

19 Como cha'an wen añach la' ña'tyalbal mi la' wubin chancol la' mulan la' ñach'tyan locojob.

20 Como chancox la' lolon cuche' ti jump'ej la' pusic'al jini chancol ba yotsañetla ti ajtroñel i cha'añob o jini chancol ba i xujch'ibeñetla la' cha'an o mi jini mu' ba yotsañetla ti' wenta che' wen ñuc mi' pas i ba o mu' ba i jats'etla ti la' choj yubil che' chancol i lolon wajleñetla.

21 Mij quisnin como ma'ix lojon c ch'ejlel yubil cha'an lojon c cha'len che' bajche' mi' lolon cha'leñob. Pero ti cha ba jach yom i lolon chan isan i ba, joñon je'el mi quejel c poj pas c ba ti ñuc. Chancolon ti t'an che' bajche' loco ba quixtyañu.

22 ¿Hebreojob ba jini yañob' ba ajcantisajob? Hebreojon je'el. ¿Loq'uemo' ba ti junmujch' quixtyañujob i jiñajlel Israel? Cha'ach joñon je'el, loq'uemon ti i jiñajlel Israel. ¿I jiñajlel ba jini Abraham? I jiñajlel Abraham je'el.

23 ¿Ajtroñelob ba i cha'an Cristo? Más ñumen ajtroñelon tyo i cha'an Cristo aunque che' bajche' mach'an mic ña'tyan pañimil yubil mic cha'len t'an. Como tsa'ix c más cha'le subt'an che' bajche' jini yañob' ba ajcantisajob. Tsa'ix i más jats'ayañob. Tsa'ix más cajchiyon. Ti más ñumiyon ba' babaq'uen mic sajtyel.

24 Jo'yajlel ti' jats'ayañob che' puro treinta y nueve ti' jats'ayañob jini lojon c pi'alob jini israelo' ba che' ti yalq'ueyon c xot' c mul yubil.

25 Uxyajlel ti' jats'ayañob ti tye'. Junyajlel ti' juluyañob ti tyun. Uxyajlel ti ochi barco ti mal ja' che' ya' añon.

Junyajlel ti lojon c ñusa jump'ej q'uin jump'ej ac'balel ti pam tyam ba ja' che' ti sujpi' ochel ti mal ja' barco.

26 Cabal tic cha'le ñajt ba xambal. BABAQ'UEN jini colem ja' tyac ti quila che'

ti ñumiyon ti i pam. BABAQ'UEN mi' xujch'ibeñon cha ba an c cha'an ti ajxujch'ob. BABAQ'UEN mic sajtyel ti' c'ab lojon c pi'alob tic lumal yic'ot ti' c'ab tyalem ba ti yamba lum tyac ti cubi. BABAQ'UEN mic sajtyel ti lum tyac, ti ma'tye'el tyac yic'ot ti colem ja' tyac ti cubi. BABAQ'UEN mic jilel cha'an ti quixtyañu mu' ba i cuy i ba ti hermañujob ti cubi.

27 Cabal tic ñusa c lujbel cha'an tic wen cha'le tsats tyac ba troñel. Tic ñusa ñoj tsats tyac ba c wocol. Cabal ma'an tic cha'le wayel. Tic ñusa wi'ñal yic'ot tyalquin ti'. Cabal tic cha'le ch'ajb. Tic ñusa wocol cha'an tsañal yic'ot che' ma'ix jasal c pislel.

28 Mach jinic jach jini, pero an yan tyac ba je'el. An al ba j cuch yubil je'el ti jujump'ej q'uin cha'an an tic wenta pejtye'el ochemo' ba ti' t'an Dios ti templo tyac.

29 Mi an hermañu mach'a ba'an xuc'ul mach xuc'ulonic je'el ti caj mi cubin. Mi an majch mi yotsaben i mul juntiquil hermañu quisintic mi cubin. Com j cotyan mi cubin. Mich'on yic'ot jini tsa' ba i xiq'ui i yotsan i mul yubil.

30 Mi wersa yom mic pas c ba ti ñuc mi quejel c sub c ñuclel cha'an ti jini mu' ba i tsictisan añach i c'unlel c bac'tyal.

31 Dios i Tyat lac Yum Jesucristo yom ba mi sujbel i ñuclel ti bele' ora yujil isujm melelach c t'an mu' ba c sube'.

32 Che' ñac ya' añon ti lum Damasco ba i c'aba' an ñuc ba ye'tyel am ba ti' wenta jini rey Aretas ba i c'aba'. Ti' wa'choco ajcañatya ti jujump'ej i ti' lum cha'an i chucon cha'an mij cajchel.

33 Pero ti colem chiquib ti' chocoyañob jubel ti lum ti jump'ej chan ba ventana ti jumpatlel jini corral i cha'an jini lum. Che' jini ti puts'iyon loq'uel ti' c'ab.

Jini tsa' ba tsictiyi ti' wentyalel ñajal

12 ¹ Ma'ix cha ba yes mic tyaje' che' mic tyaje' c ba ti wen ba t'an. Más wen mic tyaj ti t'an jini tsa' ba quila che' bajche' tic ñajal yic'ot tsa' ba i yalq'ueyon c ch'am'en i sujmllel lac Yum.

2 Mij cañe' juntiquil quixtyañu chancol ba i ch'ujbin Cristo. Añlach catorce jabil wale iliyi ti rajyi letsel c'ala ti yuxlajmlel ba chan. Mach kujil mi an ti' bace'tyal o mi an jach ti' ch'ujlel che' ti rajyi letsel. Dios jach yujil.

3 Mi an ti' bace'tyal o mi mach'an ti' bace'tyal, Dios jach yujil.

4 Pero kujil ti rajyi letsel ti paraíso ba i c'aba' ba' ti yubi t'an wen mucul tyac ba mach'la ch'ujbi cha' ajlic wala' ti mulawil pero je'el mach yom ba mi cha' subentyel yamba quixtyañu yubil.

5 Ch'ujbi c sub c ñuclel cha'an ti jini tsa' ba quil pero mach ch'ujbi c bajñel c pas c ba ti ñuc. Pero mux poj c pas ti ñuc yubil i c'unlel c bace'tyal. Como joñoñlach tsa' ba rajyiyon ti chan.

6 Aunque com c tyaje' c ba ti wen ba t'an mach tonto t'anic jach jini como melelach bajche' mi cale'. Pero ma'ix mi quejel c lolon cale' c ñuclel ame an majch mi' q'uelon ti más ñucon che' bajche' añon o che' bajche' tsa'ix yubi ti cala ti yamba ora.

7 Ame mic lolon chan isan c ba cha'an jini ñoj wen ba tsa' ba aq'uentiyon c ch'ame' i sujmllel ti aq'uentiyon c ñusan wocol che' bajche' ch'ix ochem tic bace'tyal yubil. Tyalem ti Satanás jini c wocol cha'an i tyac'lañon.

8 Uxyajlel tij c'ajtibe lac Yum cha'an mi lajmel jini c'ux ba c cha'an.

9 Pero lac Yum ti' subeyon: Jasal c p'untyaya cha'añet. Más mi tsictiyel c p'atylel che' ma'ix i bajñel i p'atylel quixtyañu, che' ti' subon lac Yum. Jin cha'an c'ajacña coj che' c'uñon cha'an mi tsictiyel i p'atylel Cristo quic'ot.

10 Jin cha'an c'ajacña coj mi cubin che' c'uñon, che' mi' wajleñoñob, che' an c wocol, che' mic tyac'lanlyel, che' an ñoj tsats tyac ba c wocol mu' ba quilan cha'an ti caj Cristo. Como che' más c'uñon más ch'ujbi i tsictisaben i p'atylel Cristo.

Mi' cha'len pensal Pablo cha'an jini ochemo' ba ti' t'an Dios ya' ti Corinto

11 Tic cha'le bajche' mach'an mic ña'tyan pañimil che' ñac tic tyaja c ba ti wen ba

t'an pero wersa ti la' xiq'uuiyon ti t'an yubil. Aunque ma'ix ñucon ma'ix más ñucob bajche'on jini mu' ba i cuyob i ba ti ñoj ñuc ba yajcabilo' ba ajsubt'añob ñumel. Pero chancox la' lolon tsaclen majlel jini chancol ba i cuyob i ba ti ñoj ñuc ba ajsubt'añob ñumel.

12 Ti tsictiyi mi yoque yajcabilon ba ajsubt'an ñumel che' tic pasal i señajlel i p'atylel Dios ti ñuc tyac ba c melbal yic'ot babaq'uen ba señañlel che' ñac tic cha'le subt'an ya' ba' añetla. Jal tij cuchu la' ñajayel.

13 Ma'ix tij q'uele ti más ñuc jini ochemo' ba ti' t'an Dios ti yan tyac ba templo. Lajal tij q'ueleyetla ti ñuc. Che' bajche' mi ma'ix tij q'ueleyetla ti ñuc yubil che' ma'ix tij c'ajtibeyetla la' cotyañon ti cha ba yes yom c cha'an. Mi tic mich'q'ueleyetla mi la' wubin, ñusabeñonla c mul, che' jini.

14 Wale iliyi chancox c pensalin c jula' añetla ti uxyajlel. Ma'ix mi quejel j c'ajtibeñetla j cotyantyel. Como ma'ix mic pensalin cha ba an la' cha'an pero mic pesaliñetla. Como tyatyalob mi' cotyañob ti tyaq'uin i yalobilob. Mach jinic yalobilob mi' cotyañob ti tyaq'uin i tyat.

15 Ti pejtyecl c pusic'al mij c'añe' c tyaq'uin cha'añetla. Jinic tyo mi cac' c ba cha'an j cotyañetla cha'an la' wenlel. Pero che' más mic p'untyañetla ts'itya' jach mi la' p'untyañon yubil.

16 Pero an tyo jini mu' ba i lolon alob cha'an mic mucul ña'tyan bajche' mic cha'len. Tic ch'ambeyetla cha ba an la' cha'an aunque ma'ix tij c'ajtibeyetla j cotyantyel ti cha ba jach yom c cha'an mi lolon yalob.

17 Che' bajche' tsa'ix c lotiyetla yubil mi' cha'leñob cha'an ti jini quixtyañu tsa' ba c choco majlel ya' ba' añetla.

18 Tij c'ajtibe Tito cha'an majlic i jula' añetla. Tic choco majlel yamba hermañu yic'ot. ¿Tsa'ix ba i lotiyetla Tito? ¿Mach ba lajal ti ajniyon lojon quic'ot jini Tito? Lajalch.

19 C'o'ojl chancol la' lolon ña'tyan chancol lojon c jop' j cotyan c ba ti t'an ti

la' tyojlel cha'an mi la' q'uelon lojon ti wen. Pero mach che'iqui. Pero chancoc lojon c cha'len t'an ti' tyojlel Dios ti' c'aba' Cristo. Pero pejtyelex jini ti lojon c cha'le cha'an mi la' xuc'chocontyel ti lac Yum, p'untyabilet ba la quermañujob.
 20 Pero añlch c baq'uen ame che' mi quejel j c'otyel cula' añetla ma'ix mi quejel c tyajetla che' bajche' com j q'ueletla. Ame mach che'ic añon bajche' la' wom la' q'uelon. Añlch c baq'uen ame an periyal, ame mi la' mich'q'uel chla ba an i cha'an yamba, ame mi la' mich' q'uel la' ba, ame chancol la' lolon bajñel pensalin la' bajñel wenlel, ame mi la' jop'ben la' ba la' mul ti tyojlel la' pi'al, ame mi la' lolon tyaj la' ba ti t'an, ame chancol la' lolon pas la' ba ti ñuc, ame mach wenic añetla che' mij c'otyel ya' ba' añetla.

21 Añlch c baq'uen ame che' mi quejel j c'otyel ti jula' ya' ba' añetla Dios mi quejel i yal'queñon cubin ch'ajyem ba. Ame mi quejel c wersa cha'len uq'uel che' mij q'uel tsa'ix la' wotsa la' mul c'ala wajali. C'ala max tyo ti la' caya la' cha'len la' tsuculel, la' pejcan yamba winic yamba x'ixic. Ame c'ala tyo mi la' cha'len jini mach'la wen tsa' ba la' cha'le wajali.

Cojix ba t'an tyac yic'ot saludos

13 1 Ti yuxyajlelel mi quejel c tyalel c jula' añetla. Mach yom mi lac ch'ujbiben mi an i mul quixtyañu ti' t'an jach juntiquil pero yom mi lac ch'ujbiben i t'an cha'tiquil o mi uxtiquil tsa' ba i yoque ilayob.

2 Che' ñajt tyo añon mic cha' subeñetla ti la' pejtyelex che' bajche' tic wa subeyob jini tsa' ba i cha'le mulil che' ñac tsajniyon ti cha'yajlel ya' ba' añetla. Che' mic cha' tyalel ma'ix mi quejel j cuchben jini tsa' ba i cha'le mulil. Mi quejel c tyoj isañob.

3 Che' jini mi quejel la' q'uele' mi añlch i p'atyalel c t'an. Como la' wom la' ña'tyan mi chancol i cha'len t'an Cristo ti joñon. Mach lolon t'anic jach mi' cha'len Cristo che' mi' tyoj isañetla. Mi' pas'eñetla i p'atyalel i t'an.

4 Melelch c'un Cristo yubil che' ti joc'le ti cruz. Pero wale iliyi mi yajñel cha'an ti' p'atyalel Dios yic'ot. Ch'ach je'el c'uñon lojon quic'ot Cristo pero p'atyalon lojon cha'an ti' p'atyalel Dios quic'ot cha'an mi lojon c motin ajñel yic'ot cha'an mi lojon c tyoj isañetla.

5 Ña'tyanla mi melelch mi la' ch'ujbin Dios. Pensalinla ti la' bajñel pusic'al bajche' añetla. ¿Mach'a ba'an mi la' ña'tyan Jesucristo mi yajñel la' wic'ot mi i cha'añetla? Mi mach'an mi yajñel la' wic'ot chancol jach la' lotin la' ba che' mi la' wal ochemetla ti' t'an Dios.

6 Pero c'o'ojl mi la' ña'tyan mach ti ti'ic jach mi lojon c ch'ujbin Dios.

7 Mi lojon c pejcabebñetla Dios cha'an machic la' cha'len jini mach'la wen. Mach cha'an tsictiyic mi wen mi lojon c cha'len cantisa pero cha'an weñlch añetla aunque ma'ix lojon c wenlel yubil.

8 Como ma'ix mi lojon contrajin jini yoque melel ba i t'an Dios pero yom c tsictisan cha'an melelch i t'an Dios.

9 Jin cha'an c'ajacña lojon coj mi cubin che' p'atyalel, aunque c'uñon lojon yilal. Muc'on lojon ti oración cha'an más mi la' xuc'tyal ti' t'an Dios.

10 Ñaxan tyo mic wa ts'ijbubebñetla ili jun che' max tyo cha' ajñon cha'an mi la' tyoj isan la' ba. Cha'an che' mij c'otyel mach wersa mic tsatsa xiq'uetla ti' p'atyalel c t'an. Ti yac'on c p'atyalel lac Yum cha'an mi la' xuc'tyal. Mach cha'anic mi la' jisantyel.

11 Wale hermañujob, ajñenla che' c'ajacña la' woj mi la' wubin. Jop'ola la' wajñel ti xuc'ul. La' aq'uentiquetla i ñuc isantyel la' pusic'al. Ajñenla ti uts yic'ot ti' ñlch'tyalel la' pusic'al. La' ajnic la' wic'ot i ñlch'tyalel la' pusic'al yic'ot p'untyaya tyalem ba ti Dios.

12 Aq'uen la' ba saludos che' bajche' mi la' bele' cha'len.

13 Pejtyel hermañujob mu' ba i ch'ujbin Dios mi' chocbeñetla tyalel saludos.

14 La' ajniquetla ti yutslal i pusic'al lac Yum Jesucristo, yic'ot ti' p'untyaya Dios yic'ot mi la' motin ajñel ti uts yic'ot ti Ch'ujul ba i Ch'ujlel Dios. Amén.